



## Aningaasanut Nunanullu Allanut Naalakkersuisoq

**Aningaasaqarnermut Ataatsimiititaliap suliaq nr. 01.31.06/07-00278 pillugu ulloq 12. oktober 2007-imi aalajangiinera pillugu Naalakkersuisunut ilisimatitsineq.**  
(Naalakkersuisut ulloq 10. september 2007-imi aalajangiineranni imm. 2d)

### **Inuussutissarsiutinut ilinniartitaanernut aammalu ilinniagaqarnersiuteqarnermut tunngasuni ilassutitut aningaasaliissuteqarnissamik qinnuteqaat**

#### Naalakkersuisut **inassutigaa**,

- kontomi pingaarnermi 62.03.10-mi, Ilinniagaqarnersiuteqartitsivimmi immikkut akiliutinut, angalanermut aningaasartuutinut il.il. tunngasumi, aningaasaliissutit - 2.900.000 kr.-inik ikilineqassasut
- kontomi pingaarnermi 62.03.11-imi, Suliffeqarfiutigisani immikkut akiliutinut, angalanermut aningaasartuutinut il.il. tunngasumi, aningaasaliissutit 4.900.000 kr.-inik amerlineqassasut.
- kontomi pingaarnermi 62.02.08-mi, Inuussutissarsiutinut ilinniartitaanerit ataanni ilinniarfinnut tunngasumi, aningaasaliissutit 3.205.000 kr.-inik amerlineqassasut.
- kontomi pingaarnermi 20.05.44-mi, EU-mik suleqatigiinnissamik isumaqatigiissummit isertitanut tunngasumi, aningaasaliissutit -8.750.000 kr.-inik amerlineqassasut.
- kontomi pingaarnermi 20.11.61-imi, Ilinniartitaanermut sillimmatinut tunngasumi, aningaasaliissutit 3.545.000 kr.-inik amerlineqassasut.

#### **Aningaasaqarnermut Ataatsimiititaliap oqaaseqaatai**

Paasissutissat annertunerusut pissarsiarineqarnissaat siunertaralugu suliama matumani aalajangiinissani Aningaasaqarnermut Ataatsimiititaliap siusinnerusukku kinguartippaa.

Ataatsimiititaliap apeqqutaanut akissutertik Naalakkersuisut maanna nassiuppat. Akissuteqaat aalajangiinermut matumunnga ilanngussatut ilanngunneqarpoq.

Naalakkersuisut akissuteqaataat tunngavigalugu inassuteqaatit ataatsimiititaliamit akuersissutigineqarsinnaapput. Imali oqaaseqaateqarnissani ataatsimiititaliap kissaatigaa:

1. Ilinniartut angalaneranni billetsit aappalaartartut sapinngisamik annertunerpaamik atorniarneqartartut Naalakkersuisut paasissutissiissutigaa. Pisortat aningaasaataannik akisussaassuseqartumik atuisoqaqqullugu immikkoortoq pineqartoq Naalakkersuisunit suli annertuumik eqqumaffigineqassasoq Aningaasaqarnermut Ataatsimiititaliamit naatsorsuutigineqarpoq. Malerugassaq pingarneq tassaasariaqarpoq billetsinik aappalaartuinnarnik atuinissaq, taamaattorli tak. nr. 2.
2. Ilinniarnermik aallartitsineranut atatillugu billetsit utertinneqarsinnaasut ("qorsuit") ilinniartunut atorneqartarnerisa ingerlatiinnarnisaa pisariaqartoq Naalakkersuisut

paasissutissiissutigaa. Tamatumunnga tunuliaqutaavoq ilinniartut ilinniarnissamut akueritereeraluarlutik ilinniarnerminnik aallartitsinnginnissartik toqqartarmassuk, taamaattumillu billetsit utertinneqarsinnaanngippata maangaannassallutik. Tamanna Aningaasaqarnermut Ataatsimiititaliamit tusaatissatut tiguneqarallarpoq, tamatumali peqatigisaanik ilinniarnissamut takkutinngitsoornerup ersarissumik kinguneqartinneqartarnissaanik pilersitsisoqassasoq ataatsimiititaliap isumaqarluni. Taamaaliorneq ilinniartinni allaffissornikkullu nukinnik atuilussinnartitsisarpoq, tamatumalu peqatigisaanik ilinniartunut inissiani ilinniartinnilu inissaq, allamit ilinniarusussuseqarnerusumik atorneqarsinnaagaluartoq maangaannarluni. Taamaattumillu ilinnialersussat nalunaaruteqaqqaaratik ilinniarfissaminnut takkutinngitsoortut takkutinngitsoornerup inuiaqatigiinnut aningaasatigut annaasaqaataaneranut nallersuuttumik taarsiissuteqarnissamut peqquneqartassat ataatsimiititaliaq isumaqatigiittoq isumaqarpoq!

3. Ilinniagaqarnermut siuteqartitsiviup suleriaatsiminut mappia qaammammi matumani internetimut ilanngunneqassasoq ataatsimiititaliap maluginiarpa. Suleriaatsimut mappi taanna, ilitersuutitut ilusilerneqarsimasutut ataatsimiititaliamit paasineqartoq, ilinniartinnit maanna pigineqalereersimassasoq ataatsimiititaliamit naatsorsuutigineqarpoq. Aalajangiineq matumani pineqartoq tiguneqarniarpat mappi kinguarsaanertaqannngitsumik ataatsimiititaliamit misissugassanngorlugu nassiunneqarnissaa ataatsimiititaliamit naatsorsuutigineqarpoq.
4. Aningaasaqarnermut Ataatsimiititaliaq siumoortumik akuersissuteqarsimatinnagu kontomi pingaarnermi 20.11.61-imi, Ilinniartitaanermut sillimmatinut tunngasumi, aningaasaliissutinik nuussisoqarsinnaananilu atugassiissuteqartoqarsinnaanngitsoq iluarisimaarlugu ataatsimiititaliap maluginiarpa.
5. Kiisalu missingersuutinut tapiissutit, ilinniarnikkut iliuuseqarnissamut tapiissutigineqartut eqqortumik atorneqarnissaannut EU uppernarsaatissanik qanoq ittunik piunasaqarnerasoq pillugu nassuiaammik naatsumik pissarsisinneqarnissani ataatsimiititaliap kissaatigaat. Tassunga ilanngullugu piunasaqaatinik taakkuninnga Namminersornerullutik Oqartussat tamakkiisumik eqquutsitsinerannut uppernarsaat kissaatigineqarpoq.

### **Aningaasaqarnermut Ataatsimiititaliap aalajangiinera**

Siuliani allassimasutut paasinnilluni Naalakkersuisut inassuteqaataat Aningaasaqarnermut Ataatsimiititaliamit **akuersissutigineqarput.**

Naalakkersuisut akissuteqaataat kalaallisut danskisullu kiisalu qarasaasiakkut uunga piaartumik nassiunneqassasoq qinnutigineqarpoq: [nch@gh.gl](mailto:nch@gh.gl).

Inussiarnersumik inuulluaqqusillunga

Ruth Heilmann

Aningaasaqarnermut Ataatsimiititaliami siulittaasuugallartoq